

廬山太平宮採訪真君事實卷之一

陞四

廬山太平興國宮採訪真君事實序

陞四

夢當時使者之語以謂後五百年福及生靈以曆考之自開元辛未距今行及五百年矣元宗皇帝建祠以事而使者之名顯國朝累聖宗奉神宗皇帝虔進聖號徽宗皇帝加上寶冊而使者之位益重祀典益崇禮意益至殊祥異貺影從響答其在斯歟義問來九江適太守大卿胡公紘以清靜理郡政民神協從甲戌春舉行舊典以義問攝祀事于太平興國宮禮畢因觀山川之勝穹隆磅礴層見

疊出不可名狀是宜高真之所慎擇也宮之  
道士有向師尚者清修自持且有心於闡宗  
立教以使者應化之迹泯泯未傳求義問編  
次義問不敢以鄙陋辭謹列于左方紹興二  
十四年中元左朝奉郎通判江州軍州事兼  
管內勸農營田事賜緋魚袋葉義問謹序

廬山太平興國宮採訪真君事實卷之一

分真初始類

考原

謹按

太上三天正法經云九天真王與元始天王

俱生始炁之先天光未明鬱結未澄混沌太

虛浩瀚流冥七千餘劫元景始分九炁肇存

相去九萬九千九百九十歲青童君注爾時未有歲月九炁

既有一炁相去九萬九千九百九十里為一歲清炁高澄濁炁下布

九天真王元始天王稟自然之炁故稱九天

之號九天司命者萬物受生之真宰也九天  
丈人者亦真景德之宗師也九天使者監御  
萬靈之真神巡察三界賞善罰惡之總司也  
又九天鳳炁元丘太真書云太上丈人下授  
五嶽君却禍除殃其中曰九天真王者伏千

陸四

神使衆靈又南唐降現真圖記稱使者真君  
有五號一曰九天真王二曰朱陵上帝三曰  
火鍊真人四曰南上真君五曰九天採訪使  
者

上帝錫之七暎平華九德偃月金晨玉冠九

光紅霄飛雲金羅之帔曳紅霄碧襯海嶽之  
裳單衣羽襖朱霞霄袞紅玉霄裙六華銖衣  
躡元朱光之履飛紅單舄執太元碧琳之圭  
瓊華翠簪佩九天採訪南上真君使者金冊  
九元之劔五帝伏魔之印九天真王之印採  
訪靈威攝邪之印授北極天帝五靈尊神吏  
兵天丁之印五百靈官五帝三官三河四海  
五嶽四瀆九江五湖十二河源溪女吏兵之  
印白鶴師子擁御青龍白虎護衛六丁六甲  
侍列左右九天仙女十二溪真陳奏樂部扶

桑大帝賜谷神王太極真人以為副從上三  
皇時下降為九龍使者中三皇時為九都使  
者下三皇時為元都使者黃帝時為真元使  
者帝堯時為太清使者帝舜時為九疑使者  
大禹時為元夷蒼水使者助禹治水成功周

陞四

三

穆王時為天靈使者唐元宗皇帝時為九天  
採訪使者九天在三十二天之上統九億萬  
諸天地人物應中國九宮九州九星分野太  
一之數以定災福大小運炁陽九百六之災  
臨諸分野各有天帝靈官主司也生化人物

天數甚多以九天配日月星宿照臨天下萬國九州八極十方世界天人祿壽筭數貴賤能鎮生化之源者即

太上真元无極大道玉皇尊帝太上老君高居九天下臨真化故命九天真王受朱陵上

帝為使者威德備三清之法尊宗亞天帝之位採訪之權靈通應感著於聞見皆可考焉則知真王乃天中貴神所以分真宅靈下鎮洞天福地利澤邦家體虛皇以闡慈代昊天而示化累朝崇奉縉紳信禮士庶欽仰靈貺



昭彰豈區區淫祀之比哉

見祥

元宗開元十九年二月十五日夜寢靈符殿  
夢神人仙仗甚盛語帝曰吾是九天使者被  
受混元正真玉帝太上老君勅命採訪九天  
九地三界十方萬國九州八極內外觀察巡  
遊較定天人祿壽生靈罪福建立採訪總司  
九天司命真君開治舒州潛山九天丈人真  
君開治蜀郡青城山吾今開治江州廬山可  
於三山興置齋祠後五百年福及生靈言訖

而覺明日元宗宣諭群臣時宰相張說奏言  
陛下夢且當春或恐未審帝乃設案焚香至  
誠禱顙須臾雲鶴仙仗森布舍元殿前第見  
使者乘青龍之車靈姿妙粹瑞相端妍帝為  
虔拜使者以左手約之時見五百靈官九江  
水帝十二溪真上清二十四位真人儀仗羅  
列百官瞻望乃詔吳道子肖貌勅內供奉張  
奉國及法師張平公等齋像詣江州命刺史  
獨孤正縣令魏昌建祠於廬山之陰

宅靈

本宮係真君親擇勝地居廬山西北隅先是  
明皇遣使搜訪山水佳處莫知適從舊傳有  
居民陳氏所居平夷忽有道士踵門謂曰此  
地宜使者廟基汝盍捨諸當獲靈佑陳曰願  
也第家貧不能遽遷耳道士曰吾為汝遷謹  
無費遷已汝身後為此方土地言畢而逝陳  
愕然是夜風雷大作及曉陳家于山之南崦  
矣今宮之左有地主祠血食一方靈通昭著  
潯陽之義門陳氏即其後也宮基正坐聖治  
峯前連引橫山在巽天醫之方自艮臨震乃

得貪狼而歸玉兔生炁也天醫主拯救生靈  
生氣主長養萬物道家以迴骸起死為功以  
度人濟物為行真君宅之亦宜坐乙向辛皆  
合天心左右龍虎蜿蜒盤踞互相揖抱十有  
二重應十二辰大溪自巽入乾復回坤地別  
有小澗發源聖治峯歷午未與大水合四面  
方位周流無間冬夏不涸宮前案山名遊魚  
上水孤峙宮前有同朝禮外案自瑞昌縣排  
列以至蘄黃二州環望數百里重疊如屏障  
襟江帶湖如拱揖此宮也聖治峯特高於諸

峯左右群峯千巒萬壘為之輔翼南接虎溪  
福地康真人道場葛仙翁鍊丹之井北跨詠  
真洞天董真君種杏上昇之館後有呂仙翁  
藥爐丹竈遺址存焉背抵五老峯倚天青壁  
屏圍於外神人所居是豈偶然者哉

應真

初元宗夢見使者云建祠之處自有木植但  
加工力而已及中使至得地于聖治峯前別  
引橫山扶輿磅礴迤邐而下如頓萬馬基甫  
定而巨木數萬隨水至至隨用隨足工役之

興常有神光如晝力作忘倦旬月告成中使  
復夢神人曰粉堊丹綠此地有之不待他求  
鑿祠之北五色具備或云是材也昔元江王  
布擬作宮殿之用沉埋湓浦以待今日吁異  
哉祠西長廊在巨澗湫流之上水聲出澗聞

於地中其祠號九天使者廟元宗御篆九天  
使者之殿六字南唐昇元二年就祠改通元

府

山前今有  
府前市

本廟太平興國二年

太宗皇帝改為太平興國觀宣和六年

徽宗皇帝御筆改觀為宮

彭澤尉潘觀祥驗記其略云建祠之初靈  
異有五不雨不風水忽漂漲移棧近山冰  
復仍舊一也丹粉雜色穴出崖生私求者  
失路廟用者必獲二也謝土之夕連宵風  
雲焚香告祈俄頃雲收風息祭之日宇宙  
澄空會此良辰仙燈遠照三也彭蠡津渡  
之處時有數百人求渡云我往廬山謁使  
者廟汝載我當酬汝直渡已各留五錢經

陞四

六

宿閱之錢乃成紙乃知鬼神遠來欽禮見  
斯瑞像以示於人四也使者騎從龍君虎  
吏刻削馭人或泥或木入廟之後忽有數  
尊汗流霹靂濡其面仙靈所役莫汗交  
流稽驗具存人神匪別五也凡此五  
事前世罕聞刻石紀之以傳來者

殿宇像設

九天採訪應元保運真君之殿  
神宗皇帝御  
書後降兵火

今乃王塑採訪居中左右侍立金童玉女靈

官各二六丁六甲各六殿內兩壁畫上清太

微二十四位真人殿外兩壁左畫十二溪真

右畫九江水帝三江大王皆做吳道子之本

相貌奇古精神聳動殿前左防觀右護法閣

下驛龍金虎大將殿之左翼三官大帝殿右

翼四聖真君殿主廊左有道藏榜曰瓊章寶

室于湖張孝祥筆貯經五百二十八函計五千二百八十七卷外九十九函奉敕禁隱

不曾頒降係楊和王府捨右有天師堂榜曰正一之殿紹

興二十八年十月內恭奉



高宗皇帝特旨於採訪殿後剏建大殿專一

崇奉

皇帝御容本命賜名申福殿殿之右漳泉慈

濟真君殿殿之左三山澗靈澤龍王殿嘉泰四年

敕封事紹定五年剏三清寶閣中塑九皇御

陸四

座左脇樓九天丈人真君像右脇樓唐元宗

皇帝像嘉熙四年閏十二月內

理宗皇帝賜御書三清閣三大字脩廊左右

各二十五間左畫採訪真君自三皇五帝以

至于今降現異號右畫採訪真君自興置以

來賞善罰惡習仙析嗣靈驗事蹟轉廊左右  
各五間畫五百靈官像天冠絳服如朝謁儀  
相貌各異皆以次列係倣唐待詔院畫亦近  
代竒筆也脩廊中有石壇三成左有磚閣五  
層上安洪鍾榜曰景陽右有磚閣五層上塑  
朱陵大帝榜曰朱陵兩轉廊之間為內三門  
榜曰紫元景曜之門張子湖書內亭榜曰詠真洞  
天張榜按舊記云得道劉德本遇仙人從遊  
入詠真洞天所扁如此及見採訪考校世人  
罪福而出階下有石一株舊記云有劉越者

從此出入康阜真人赴劉約叩此石而入會

于洞府今有亭曰劉仙石此外為外三門曰

太平興國之宮徽宗賜御書後罹兵門接度

仙橋松杉蒼鬱徑皆石甃有亭臨驛路榜曰

天下太平亦樗大殿後有道紀堂吳說蓮池

蓮會堂抱一堂易山齋書虛室紫溪真逸書泡泉雲無

心堂始因清虛皇甫居此于湖隸書取高

後皇甫遷居本宮鉢聽雨軒厲屏跨碧橋何

尹御書碑亭中藏石刻御書敕黃省劄壽左

右兩山道院共三十餘所依山傍水窻戶玲

瓏誦聲琅然內有希微堂今葆清是也有墨

仙泉因洞賓得名天籟堂東坡留題有枯木怪石于壁間洪芻跋之老

圃堂山谷紀遊也葆真庵方壺梅竹幽邃眼界清

楚樗寮書額及名其如真一庵鏡泉寒碧軒

留雲閣冷翠閣名勝翰墨具在詩集宮後有

陞四

靈澤龍湫上中下三潭一潭在高崖絕壁之中嶮不可攀中下兩潭可往來祈

禱樵者常見龍戲珠每雲起仙人誦經臺有時山前人望龍附雲而上

石突出如經案樣四邊石紋摺疊若飛雲洞

幃每陰雨時採樵者聞誦經之聲

洞中可坐二三十人又有一竅隱隱而入近

生一石當門不可入但雲起則雨雲聚則晴

山前人皆以宮前有祝

此驗其晦明

聖放生池積金池左右龍虎環抱松風蘿月  
清流竒石夙隔人境真天下形勝福地

### 蓮花會

唐自建祠宇以後選差道士蔡仙覺孟仙真  
吳太清歐陽法明凌知隱焚修香火越明年

八月朔致醮落成是日江淮間士庶耆艾緇  
素之徒不約而集者數千人慶成齋醮晝夜  
不絕時蓮花盛開朝謁者各捧一花為供爭  
置殿陛之下喜相告曰此會殊勝盍命為蓮  
花會誓歲以此日同會于此祈年穀穰疢癘

庶幾使者垂祐錫羨以福我衆萬口一辭再

拜而去出舊記

不繼却採訪行

江東憲周彥質作

君不見開元天子全盛時高拱昭曠居無為

陸四

九

人神和協天意得太史按謀書庀禧六宮深

鑱青春夜新月朦朧照臺榭金鈴不曳禁直

閑宸慮澄清鎮多暇嬪嬙嬙衛宿昭陽宮時聽

禁鼓鳴丁叢恍然帝夢見神物千幢萬燾來

虛空陰雲滌蕩天衢碧風伯雨師親執職天

地水府神官從後導前驅齊衛翼金車龍御  
雲中央穆穆天表端圭璋霓旌鳳蓋颺晴影  
縹緲鸞珮聲琅琅爭傳天語青冥上低詣神  
都駐仙仗自言帝命有司職領使九天躬採  
訪側聞廬阜窮幽清願寄一畝營官庭慙慙  
禱祀五百年自有至福覃生靈銀箭頻更春  
漏短清寐忽隨雞唱斷覺來樓殿菲微間滿  
目鶯花自零亂平明大駕朝明光坐對百辟  
言休祥大臣不敢眩天聽指引六夢多壽張  
宿齋致禱深深殿法從依然清晝現五雲掩

曠更分明不似昭陽夢中見千官瞻拜齊驪  
呼急詔道子丹青圖泥封密札下江左千門  
萬戶成須史撐橫直瞰康廬道驛使春秋奉  
宸禱天香祝簡來九重黃袍題封皆御寶龍  
樓鳳閣飛雲煙白晝往往巢神仙不知卜築  
歲月遠但見檜栢高參天年年八月蓮花會  
奔走江淮貢金貝惟將正直壓妖氛豈止祈  
禳致豐歲碧澗萬丈噴驚濤青嶂千疊爭峇  
堯春雷駭烈蛟蜃變夜醮雜還星辰朝吁嗟  
柱史非虛實故恐誕誇潛曲筆遂令琬琰失



所傳勝事竒蹤散遺逸嘗聞宣子夢鈞天屏  
息七日方言還又聞漢武事方術蕙帳清夜  
來嬋娟遺方陳迹垂編策千古朝朝甚明白  
矧茲休驗豈徒然指數年齡今五百上方至  
德追唐虞皐夔稷契勤都俞九夷百越隨指

陞四

十

呼幹轉萬化歸神樞禎祥嘉瑞無時無坐見  
和氣周綿區餘波流澤施豚魚信哉神語誠  
非虛小臣齷齪無嘉謨目覩美應徒嘻噓願  
傳史筆令直書留示萬葉永永為休符

出本  
官舊

記

廬山太平興國宮採訪真君事實卷之一



